



Naalackersuisut AIS19-imi ukiunilu missingersuusiorfiusuni misileraanermit aningaasaliissutinik 7,5 mio. kr-inik amerlassusilinnik, aalisakkanik suliffissuit nunaqarfinni qerititsivinnik sanaartornissamik annertusaanissamulluunniit atugassatut qinnuteqarfigisinnaasaannik immikkoortitsinissamik peqquneqarnissaat pillugu Inatsisartuni aalajangiiffigisassatut siunnersuut. Tapiissutit containerinik qerititsivinnik nutaanik pisinermit kiisalu aalisakkanik tunisiorfiit Nukissiorfinnut attaviliinermit akiliutissaannut, containerinik qerititsivinnik pisinerup Nukissiorfiit naammassinnaasamikkut annertusaanerannut aningaasartuutitut akiliutitut ator neqarsinnaassapput. Aningaasanit ator neqartussangortitanit agguaassinermi piffinni suliffissaqartitsinikkut suliniutinik pisariaqartitsinerit isiginiarneqassapput.

(Inatsisartunut ilaasortaq Peter Olsen, Inuit Ataqatigiit)

(Siullermeerneqarnera)

Suli annertuumik ajornartorsiutigaarput suliffissaaleqineq sualummik nunaqarfinni aamma illoqarfinni minnerni. Suliffillit imminnut pilersorsinnaapput ilaquuttatillu tamannalu imminut naleqartinnermik pilersitsisarpoq. Taamaattumik pingaartorujussuuvoq maani Inatsisartuni uangut suliffissanik pilersitsiniartuarnissarput suli amerlanerit suliffissaqalersinnaaqullugit.

Demokraatini tamanna tunngavigalugu isumaqarpugut silatusaarnerusooq Naalackersuisut maannakkuugallartoq kommunit nunaqarfinnilu aqutsisut suleqatiginerat ingerlatiinnartuuppasuk sumiiffinni ataasiakkaani inuussutissarsiornikkutat suliffeqarnikkullu ineriartortitsinerup qanoq ittuunissaa pillugu. Namminermit najukkanimi ataasiakkaani pisut ilisimaneqarluarnerusarput suullu pisariaqartinneqarnersut.

Siunnersuummi matumani pinqarpoq tunngaviummik qanoq iliorsinnaanersugut qularnaarniarlugu suli amerlanerusut aalisakkerivinni sulilersinnaanissaat aamma tamanna isumassarsiaavoq ajunngitsoq. Kisianni soorlu siunnersuutit allat pillugit oqartareersugut Demokraatini piumanerubarput misissuilluaqqaartoqartarnissaa tapeeriaatsinik nutaanik pilersitsisinnata. Matumani amingaatigaagut paasissutissat arlallit isummerfigitinnagu manna siunnersuut ilumut nunaqarfinni suliffissaaleqisunik ikilissaaqataalluarsinnaassanersooq.

Peqataaffigerusupparpulli Naalackersuisut misissuilluaqqaarnissaat. Tamanna tunngavigalugu Naalackersuisut allannguutissatut siunnersuutaat akueraarput aamma kaammattuutigissavarput Naalackersuisut allannguutissatut siunnersuutaat tassaassasooq ataatsimiititaliami suliareqqinneqartussaq.

Siunnersuut Aalisarnermut, Piniarnermut Nunalerinermullu Ataatsimiititaliamut innersuupparput..